

REGIONAL NEWS BULLETIN

HEADLINES (EVENING)

Date – 09/01/2025

Time - 18:30 -18:40Hrs

1. Union Minister of State for Tribal Affairs Pu Durgadas Uikey an kum 2014-a Prime Minister Narendra Modi-a sorkar a intan atangin hmarchhak state ten nasa takin ngaihsak an hlawh a ni a ti.
2. Women & Child Development Minister Pi Lalrinpuin vawiin khan Mizoram district tin tana ‘Widow Cell’ a tlangzarh.
3. Prime Minister Narendra Modia chuan kum 2047-a ram changkang ni tura hma a laknaah rampawna awm India mite chu an pawimawh hle a ni a ti.
4. Chhatisgarh-a Sukma district-a security force leh Maoists te inkahnaah Maoists pathum kahhlum an ni.



UNION MOS

Union Minister of State for Tribal Affairs Pu Durgadas Uikey an kum 2014-a Prime Minister Narendra Modi-a sorkar a intan atangin hmarchhak state ten nasa takin ngaihsak an hlawh a ni a ti.

Vawiina Aizawla chanchinbumite a kawmnaah Minister chuan he thu hi sawiin India ram a zalen hnua hun rei tak hmarchhak state ten ngaihsak an hlawh lo a ni a ti a. Tunah chuan chak taka hmarchhak state ten hma an sawn chu sorkarin a ngaihpawimawh leh a hnapui ber te zinga mi a ni a ti.

Minister chuan Pu Narendra Modi-a sorkarin tribal mipuite hmasawna a ngaihpawimawh hle a ni a ti a. India ram tribal mi President hmasa ber a nei ta tih sawiin hei hian tribal mi te sorkarin a ngaihpawimawh zia a tilang chiang hle a ni a ti a. Tunah hian sorkar laipuah tribal Minister 8 an awm thu a sawi a ni. Minister chuan tribal zirlaite hmasawn nan nasa takin sorkarin hma a la a ti a. Hemi atan hian Eklavya Model Residential School pawh ramchhunga hmun hrang hrangah Ministry of Tribal Affairs chuan a din a ni a ti.

Byte of Minister.....

Vawiin khan Union Minister hian Aizawl Tlangnuam veng a Eklavya Model Residential School (EMRS) a tlawh a, thusawiin Union Minister chuan zirna lama an sorkar hnathawh zinga pawimawh tak chu EMRS a nih thu a sawi a. Minister chuan Tlangnuam veng a EMRS chu a hna thawhah duhthusam lohna a awm nual thu sawiin contractor te chu uluk taka an hna thawh hun bi tawp hun, kumin March thla hmaa hnum tha taka hna zo turin a hrilh a. Tribal naupang ten zirna an hmuhna tur a ni tih hriaa an hmakhaw ngaia hna thawk turin a chah a ni.

Byte of Union Minister.....

School thawktute bakah department hotute chu an harsatna a hnena thlen zel tura chahin rang taka an mamawh phuhruk sak a tiam a. Zirtirtute chu fuihin zirtir hna chu hna pawimawh tak, mi nun thlak hlawk thei tu a ni tih hre renga inpekna nena theihtawp chhuaha hna thawk turin a hrilh a ni.

Mizoram EMRS Society Chief Executive Officer leh Social Welfare & Tribal Affairs department Director ni bawh Dr. Lalhriatzuali Ralte pawhin thu sawiin Tlangnuam EMRS panna kawng chu fehkawng chei that mai chauh a la nih avangin duhthusam a la nih theih loh thu a sawi a. Tun dinhmunah school hmunah tui a awm that loh avangin ruah tui khawlna tur ngaihtuah sak turin Minister a hrilh a. Mizoram chhunga EMRS te hmasawna tur leh din belh zel dan tura an mamawh hrang hrang Minister hi a hrilh bawh a. Kum 2023-24-ah EMRS school 6 chu bul tan a nih tawh thu leh, zirlai 1210 an awm thu a sawi a, kum 2024-25 session atan school 5 bul tan leh mek a nih thu leh tunah hian school sak mek, school 5 bakah sak thar tur 6 a awm thu a sawi a. RD block 9-ah EMRS din a nih theih nan rawtna thlen mek a nih thu a sawi bawh a ni.

<><><>

WOMEN & CHILD DEVELOPMENT

Women & Child Development Minister Pi Lalrinpuin vawiin khan Mizoram district tin tana 'Widow Cell' a tlangzarh.

National Human Rights Commission in Centre, State leh UT sorkar hnena hmaithai te dikna chanvo humhim nan leh an hmakhua ngaihtuah sakna hmanrua atana Widow Cell din tura thurawn a pek bawhzuina a nih thu Minister chuan a sawi a. Heti hian Mizoramah chuan Widow Cell hi district tin a One Stop Centre tinah din nghal a ni a ti.

Minister chuan Widow Cell-in a tum ber chu hmeithaite hmasawna tura kawng hrang hranga hmalakna bakah, hmalakna awmsa tih chak leh hmeithaite, an hmalam hun atana ruahmanna tha ngaihtuah sak a nih thu a sawi a. Hmeithai-te dikna chanvo humhalh anih theihna turte, harsatna tawkte'n an kawng an sah en theihna tura kawng lo kawhmuha lo puitu ni turte leh, hmeithaite

thlamuanna thlentu an lo nih theihna turin Widow Cell chu tangkai taka hman a nih a beisei thu a sawi a ni.

Women Cell kaltlang hian eizawna neilo ten ei an zawn theih nan thiam thil zirna lo ngaihtuah pui te, mipuite tana hamthatna scheme hrang hrang sorkarin a kalpuite lo hrilhhriat a ngaihtuahpui te, an mamawh dan azir a psychological counselling pek te, Dan hmaa an dikna chanvo an hum theih nan legal counselling pek te bakah adangte a huam tel thu hawna inkhawmah hian tarlan a ni a. Mizoram chu India ram State zingah Widow Cell din hmasa pawl a nih thu tarlan a ni bawk.

<><><>

JAN SURAKSHA

Kolasib DC Conference Hall-ah Bawrhsap Pu Robert C Lalmangaiha hoin ramchhunga mi harsate tana social security scheme pawimawh te phochhuahna tur Jan Suraksha Scheme hnuai Kolasib district-a hmalak dan enho a ni.

He thutkhawm, District Level Consultative Committee Meeting on Campaign for Jan Suraksha Schemes at Gram Panchayat level review-ah hian Bawrhsap chuan District Level Consultative Committee (DLCC) te chu mipui rawngbawltu an nih angin Sawrkar-in mipuite tana hamthatna a ruahmante kawhhmuh leh hrilhfiah ngaite hrilhfiahtu an ni tih hre reng turin a chah a. DLCC Member kalkhawm te chu Bank leh Financial Institution lama a chinchang hretute an nih ang ngeiin mipuite zirtirna petu pawimawh tak an nih thu a sawi a ni.

Jan Suraksha Schemes Campaign hi Ministry of Finance hnuai a awmin thla thum chung; ni nikum Oct ni 15 atanga tun thla ni 15 chung a neih tura ruahman a ni a. Hemi hian a tum ber chu tuna Social Security Scheme pahnih awm mek Pradhan Mantri Jeevan Jyoti Bima Yojana (PMJJBY) leh Pradhan Mantri Suraksha Bima Yojana (PMSBY) hamthatna dawngtu tihpun leh Village Council/Gram Sabha tina Campaign neih a ni a. Heng an hmalakna leh an Mapping tih tawh te hi Jansuraksha Portal ah update thin a ni.

Kolasib District chhungah Jansuraksha Campaign hi District chhunga Bank hrang hrang 21 ten an kal pui mek a. PMJJBY hnuai Campaign Target Achievement 865 chu 1232 in an khum tawh a. PMSBY hnuai Campaign Target Achievement 1006 awm chu 1385 in an khum thei bawk a ni. Tun dinhmuna Village Council 52 ah Jan Suraksha Campaign hi kalpui tawh niin, Campaign kalpuina tur Village Council 4 ah a la awm a. Tun thla ni 15 hmaa Jan Suraksha Schemes Campaign hi Kolasib District-ah zawh hman tur in he thutkhawmah hian rel a ni bawk.

<><><>

BANGLADESH

Bangladesh atanga Bawm raltlan mi 28 te chu Tuithumhna, 20 Assam Rifle Post-ah tunah hian him taka enkawl an ni.

Thudawna in a sawi danin heng raltlan te hi Kristmas leh kumthar hunpui chhung zawng khan ramhnuaiyah kalin Vathuampui hi an pan a, an mahni hi Bawm hnam niin nausen leh kum tling lo an awm nual a, kum tling chin chu kum 50 aia upa an awm lo niin a sawi.

Hruitezawl VCP Pu Rinsanga chuan heng mite hi Sipai camp ah va tlawhin sipai ten an enkawl tha a, chaw leh eitur, mutbu leh damdawi chenin an pe tha niin a sawi a, thenkhat in Burma atanga lo lut ni a an sawi chu thil theih loh leh a kalkawngah pawh tihngaihna awmlo niin Akasvani Lunglei a hrilh.

><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni. Naktuk zing dar 7 leh a chanve-ah Chanchinthar hi puan leh a ni ang.

<><><>

PM

Prime Minister Narendra Modia chuan kum 2047-a ram changkang ni tura hma a laknaah rampawna awm India mite chu an pawimawh hle a ni a ti. Vawiina Pravasi Bharatiya Divas Convention, Odisha-a Bhubaneswar-a a hawnaah he thu hi sawiin Pu Modia chuan khawvel pum ang pawha hmasawna kawngah India mi rampawna khawsaten an thawhhlawk hle a ti a. India ram than zelnaah pawh an thawk tha hle tih sawiin khawvel hmaah ram palai hna tlin takin an thawk a ni a ti bawk.

<><><>

CHHATISGARH

Chhatisgarh-a Sukma district-a security force leh Maoists te inkahnaah Maoists pathum kahhlum an ni. Thudawn danin vawiin khan Sukma leh Bijapur district inrina lai ramngawah sipaite hian Naxal-te dapchhuah beihpui an thlak a. Inkahna thlengah hian Maoists pathum kahhlum an ni a. He beihpui thlakah hian District Reserve Gaurd, Special Task Force leh CoBRA Commando te an thawkho a. Vawiin tlai thleng khan an inkap nia thudawn a ni.

<><><>